

四庫全書

集部

# 欽定四庫全書

集部

御定佩文齋詠物詩選卷百

三十五  
三十三

詳校官侍郎<sub>臣</sub>李封

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>陸湘

謄錄監生<sub>臣</sub>陳琴高

欽定四庫全書

御定佩文齋詠物詩選卷一百二十八

車類

四言古

車左銘

漢  
崔駰

虞夏作車取象機衡  
君子建左法天之陽  
正位授綏車不內顧  
塵不出軌轡以節步  
彼言不疾彼指不躬淵  
覽于道永思厥中

車右銘

崔駰

擇御卜右採德用良詢納耆老子我是匡惟賢是師惟道是式歲闕旅賁內顧自勅匪皇其度匪愆其則越戒敦儉禮以華國

小車銘

漢李尤

員蓋象天方輿則地輪法陰陽動不相離合之嘽噓疏達開通兩輜障邪尊卑是從輓軌之用信義所同

天輶車銘

李尤

奚氏本造後裔飾雍輪以代步輶以蔽容輪輶并合出入周通追仁赴義惟禮是恭

七言古 附長短句

車遥遥

唐張籍

征人遥遥出古城雙輪齊動駟馬鳴山川無處不歸路  
念君長作萬里行野田人稀秋草綠日暮放馬車中宿  
驚麕遊兔在我旁獨唱鄉歌對僮僕君家大宅鳳城隅  
年年道上隨行車願為玉鑾繫華軾終日有聲在君側

門前舊宅久已拋無由復得君消息

十九日出曹門見水牛拽車

宋 梅堯臣

只見吳牛事水田只見黃犂負車輶今牽大車同一羣  
又與騾驢走長陌印頭闊步塵蒙蒙不似綏耕泥汨汨  
一一夜眠頭向南越鳥心腸誰辨白

車家行

宋 孔武仲

上坂車聲遲下坂車聲快遲如鳥語相喧啾快如谿沙  
瀉鳴瀨一車人十捧擁行江南江北不計程青天白日

有時住無人止得車輪聲晚來驟雨聲濯濯平曉郊原  
盡溝壑方悟車家進退難不如田家四時樂

車遥遥

明 李先芳

膏車何草草遥遥萬里道遠道莫致思倚輪望見之隻  
輪不可行去客難為情駕車策馬輪已遠腸中車輪載  
君返

登車行

明 僧清澹

擎書使者來海涯躡曉迫趣登輪車高岡碾斷赤石骨

長空拂碎紅雲花大聲坎坎打天鼓小聲鳴鳴煎春茶  
羲生馭日信可並阿香撒雨何足誇直入九重紫金殿  
玉皇對坐傾流霞霓裳羽衣萬變態龍笙鳳管相喧嘩  
從容握手問至道掀髯一笑吾還家

五言律

詠車

唐李嶠

天子馭金根蒲輪闢四門五神趨雪至雙轂似雷奔  
丹鳳棲金轄非熊載寶軒無階添虛左珠乘奉王言



七言律

和李秋谷平章小車

元虞集

雪晴宮草隱晴沙  
相國朝天試帝車  
班馬晝移溫室樹  
鳴鑾晨度掖垣花  
褰帷每命賢俱載  
趣駕頻煩使至家  
此日龍門誰執御  
擁經正履待金華

七言絕句

小遊仙詩

唐曹唐

酒釀春濃瑱草齊  
真公欲散醉如泥  
朱輪軋軋入雲去

行到半天聞馬嘶

畫車

宋  
蘇軾

何人畫此隻輪車便是當年歌器圖上易下難須審細  
左提右挈免疎虞

駝車行

元  
劉秉忠

駝頂丁當響巨鈴萬車軋軋一齊鳴當年不離沙陀地  
碾斷金原鼓笛聲

予京居廿稔始作一車出入賦詩自志

元張翥

淺淺輕車穩便休何須高蓋與華輶  
短轅不作王丞相  
下澤聊為馬少游

送翰林宋先生致仕歸金華

明孫蕢

華髮朱顏六袞餘還鄉猶駕輶輪車  
龍江闕吏如相識  
應止青牛乞著書

御定佩文齋詠物詩選卷一百二十八

欽定四庫全書

御定佩文齋詠物詩選卷一百二十九

簡閱類

五言古

從武帝琅邪城講武應詔

齊王融

治兵聞魯策  
訓旅見周篇  
教民良不棄  
任智理恒全  
白日映丹羽  
頽霞文翠旃  
凌山炫組甲  
帶水被戈船  
凝葭鬱摧愴  
清管乍聯綿  
早逢文化洽  
復屬武功宣  
願陪玉

鑾右一舉掃燕然

從齊武帝琅邪城講武應詔

梁沈約

九功播桃墀七德陳武懸展事昌國圖息兵由重戰皇  
情咨閱典出車追辰選飾徒映寒隰翻綏臨廣甸颯沓  
佩吳戈參差腰夏箭風旆舒復卷雲霞清以轉輕舞信  
徘徊前歌且遙衍秋原嘶代馬朱光浮楚練虹壑寫飛  
文巖阿藻餘絢發震嶽靈從揚旌水華變憑高訓武則  
中天起遐眷鳳蓋捲洪河珠旗掃長汧方待翠華舉遠

適瑤池宴

九日登巴陵置酒望洞庭水軍

唐  
李白

九日天氣清登高無秋雲造化闢川嶽了然楚漢分長  
風鼓橫波合沓感龍文憶昔傳遊豫樓船壯橫汾今茲  
討鯨鯢旌旆何繽紛白羽落酒樽洞庭羅三軍黃花不  
掇手戰鼓遙相聞劒舞轉頽陽當時日停曛酣歌激壯  
士可以摧妖氛齷齪東籬下淵明不足羣

五言律

觀兵

唐杜甫

北庭送壯士貌虎數尤多精銳舊無敵邊隅今若何妖氛擁白馬元帥待雕戈莫守鄴城下斬鯨遼海波

陪柏中丞觀宴將士

杜甫

極樂三軍士誰知百戰場無私齊綺饌久坐密金章醉客霑鸚鵡佳人指鳳皇幾時來翠節特地引紅粧

其二



繡段裝檐額金花帖鼓腰一夫先舞劍百戲後歌雉江  
樹城孤遠雲臺使寂寥漢朝頻選將應拜霍嫖姚

七言律

癸卯二月十一日官軍發吳門

元陳基

去年移戍秋將半今歲渡江春正分晉國偏裨歸宿將  
漢庭旗鼓屬元勲戈船十萬盡犀弩鐵騎三千皆虎賁  
却笑高陽老狂客謾憑口舌下齊軍

二十二日狼山口觀兵

陳基

官軍野次狼山口鐵騎犀船盡虎驅杼軸萬家供餽餉  
旌旗千里亘江湖膝行已伏諸侯將面縛行申兩觀誅  
淮海父兄爭鼓舞將軍恐是漢金吾

汪伯子司馬閱武試

明王世貞

主恩司馬一登臺立表驂驪千騎來鎬似飛星爭犯月  
鼓如催雨不停雷橫開銅柱南頭去坐奪金城右臂廻  
此地若容狂李白也應偏識令公才



御定佩文齋詠物詩選卷一百二十九

欽定四庫全書

御定佩文齋詠物詩選卷一百三十

狩獵類

五言古

和諸葛覽從軍遊獵

陳張正見

治兵耀武節縱獵駭畿封迅騎馳千里高置起百重騰  
麕斃馬足饑鼯落劍鋒雲根飛燒火鳥道絕禽蹤方羅  
四海俊聊以習軍戎

欽定四庫全書

御定佩文齋詠物詩選  
卷一百三十

和張侍中看獵

北周 王褒

上林冬狩返回中講射歸還登宣曲觀共獵黃山圍嚴  
冬桑柘落寒霜馬騎肥縹盧隨兔起高鷹接雉飛獨嗟  
來遠客辛苦倦邊衣

伏聞遊獵

北周 庾信

虞旗喜旦晴獵馬向山橫石關魚貫上山梁鴈翅行雪  
平尋兔跡林藪聽雉聲馬嘶山谷響弓寒桑柘鳴聞弦  
鳥自落望火獸空驚無風樹即正不凍水還平誰知茂

陵下願入睢陽城

冬狩行四韻連句應詔

庾信

三川羽檄馳六郡良家選觀兵細柳營校獵長楊苑驚  
雉逐鷹飛騰猿看箭轉鳴笳河曲還猶憶南皮返

出獵

唐太宗

楚王雲夢澤漢帝長楊宮豈若因農暇閱武出輶騫三  
驅陳銳卒七萃列材雄寒野霜氣白平原燒火紅琰戈  
夏服箭羽騎綠沈弓怖獸潛幽壑驚禽散翠空長煙晦

欽定四庫全書

御定佩文齋詠物詩選

卷一百三十

二

落景灌木振嚴風所為除民瘼非是悅林叢

校獵義成喜逢大雪率題九韻以示羣官

唐明皇

弧矢威天下旌旗遊近縣一面施烏羅三驅教人戰暮  
雲成積雪曉色開行殿皓然原隰同不覺林野變北風  
勇士馬東日華組練觸地銀麋出連山縞鹿見月兔落  
高矰星狼下急箭既欣盈尺兆復憶磻谿便歲豐將遇  
賢俱荷皇天眷



奉和聖製校獵義成喜逢大雪應制

唐張說

文教資武功郊甸闋邦政不知仁育久徒看禽獸盛夜  
霰氛埃滅朝日山川淨綽仗飛走繁抨絃筋角勁帝射  
叅神道龍馳合人性五紆連一發百中皆先命勇爵均  
萬夫雄圖羅七聖星為吉符老雪作豐年慶喜聽行獵  
詩威神入軍令

同羣公出獵海上

唐高適

畋獵自古昔況伊心賞俱偶與羣公遊曠然出平蕪層  
陰漲溟海殺氣窮幽都鷹隼何翩翩馳驟相傳呼豺狼  
竄榛莽麋鹿罹艱虞高鳥下駢弓困獸鬪匹夫塵驚大  
澤晦火燎深林枯失之有餘恨獲者無全軀咄彼工拙  
間恨非指蹤徒猶懷老氏訓感歎此歡娛

獵城南

金元好問

翩翩游俠兒白馬如匹練朝出城南獵暮趁軍中宴北  
平有真虎愛惜腰間箭

七言古

附長短句

行行且遊獵篇

唐李白

邊城兒生年不讀一字書  
但將遊獵誇輕趨塞馬秋肥  
宜白草騎來躡影何矜驕  
金鞭拂雪揮鳴鞘半酣呼鷹  
出遠郊弓彎滿月不虛發  
雙鶴迸落連飛鶻海邊觀者  
皆辟易猛氣英風振沙磧  
儒生不及遊俠人白首下帷  
復何益

扈從冬狩

元耶律楚材

天皇冬狩如行兵白旄一麾長圍成長圍不知幾千里  
蟄龍震慄山神驚長圍布置如圓陣方騎雲屯貫魚進  
千羣野馬雜山羊赤熊白鹿奔青麋壯士彎弓殞奇獸  
更驅虎豹逐貪狼獨有中書倦遊客放下簾簾誦周易  
五言律

觀獵

唐王維

風勁角弓鳴將軍獵渭城草枯鷹眼疾雪盡馬蹄輕忽  
過新豐市還歸細柳營迴看射雕處千里暮雲平

觀獵

唐李白

太守耀清威，乘閒弄晚暉。  
江沙橫獵騎，山火遠行圍。  
箭逐雲鴻落，鷹隨月兔飛。  
不知白日暮，歡賞夜方歸。

觀獵騎

唐司空曙

纏臂繡綸巾，貂裘窄稱身。  
射禽風助箭，走馬雪翻塵。  
金埒爭開道，香車為駐輪。  
翩翩不知處，傳是霍家親。

觀徐州李司空獵

唐張祐

曉出郡城東，分圍淺草中。  
紅旗開向日，白馬驟迎風。  
背

手抽金簇翻身控角弓萬人齊指處一鴈落寒空

觀獵

張祐

殘獵渭城東蕭蕭西北風雪花鷹背上冰片馬蹄中臂  
挂梢荆兔腰懸落箭鴻歸來逞餘勇兒子亂彎弓

駕幸南海子

明薛蕙

詔幸芙蓉苑傳言羽獵行三驅陪上將四校出神兵列  
戟圍熊館分弓射虎城風雲日暮起偏繞漢皇營

五言排律

雲中十二韻

明楊慎

天子雲中狩將軍久未還  
律吹元兔塞旗繞白狼山  
風火燒荒急星辰過隊閒  
燕支留馬首蘇絡醉龍顏  
清樂千門動黃金萬鎰頒  
雪深懷續絮月滿憶刀鐶  
牙烏嚴宵仗宮鴉捲曉班  
奏回青鎖闥捷報紫金關  
膂力休明鎧歡聲洽禁闌  
功牌銀燦爚賀障錦編欄  
日轉虞巡外春流鎬宴間  
戢戈行有頌神武徧人寰

七言律

觀校獵上淮西相公

唐劉長卿

龍驤校獵邵陵東，野火初燒楚澤空。  
師事黃公千載後，身騎白馬萬人中。  
笳隨晚吹吟邊草，箭沒寒雲落塞鴻。  
三十擁旄誰不羨，周郎少小立奇功。

觀浙西府相畋遊

唐韋莊

十里旌旗十萬兵，等閒遊獵出軍城。  
紫袍日照金鵝鬬，紅旆風吹畫虎獐。  
帶箭彩禽雲外落，避鵝寒兔月中驚。  
歸來一路笙歌滿，更有仙娥載酒迎。



觀獵

韋莊

苑牆東畔欲斜暉  
傍苑穿花兔正肥  
公子喜逢朝罷日  
將軍誇換戰時衣  
鶻翻錦翅雲中落  
犬帶金鈴草上飛  
直到四郊高鳥盡  
掉鞍齊向國門歸

祭常山回小獵

宋蘇軾

青蓋前頭點皂旗  
黃茅岡下出長圍  
圍弄風驕馬跑空立  
趁兔蒼鷹掠地飛  
回望白雲生翠巘  
歸來紅葉滿征衣  
聖明若用西涼簿  
白羽猶能效一揮

憶觀駕春蒐

元薩都拉

日奏雲間紫鳳簫春隨天上頽黃袍仗前虎將千斤斧  
架上鷹兒五色絳獵士開弓黃犬疾宮官擊鼓紫駝高  
侍遊亦有中書人七寶雕盤看綠毛

圍獵

明楊榮

關塞霜清曉色明鑾輿校獵出邊城六龍扶輦旌旗合  
萬騎連營鼓角鳴遠火依微秋草薄驚沙寂寞暮雲平  
小臣躬覩三驅樂願效嵩呼播頌聲

扈從狩陽山次韻答胡學士

明金幼孜

鑾輿曉出五城東  
從狩儒臣載筆同  
日下蒼龍隨玉仗  
道前寶馬載琱弓  
苑松承露枝皆白  
島樹經霜葉盡紅  
向晚笳聲催疊鼓  
軍門校獵氣偏雄

七言絕句

觀獵

唐王昌齡

角鷹初下秋草稀  
鐵驄拋鞚去如飛  
少年獵得平原兔  
馬後橫捎意氣歸

校獵曲

唐錢起

長楊殺氣連雲飛，漢主秋畋正掩圍。  
重門日晏紅塵出，數騎畋人獵獸歸。

從獵口號

金李獻能

閭闔傳符啟九關，一聲清蹕駐南山。  
虎賁先導三千士，天馬初離十二閑。

其二

爛爛龍旌捧日旂，從臣遙認赭紅衣。  
天王清曉親弧矢。

初合今冬第一圍

灤京雜詠

元楊允孚

羽獵山陰射白狼  
太平天子狩封疆  
峰巒頻轉丹樓穩  
輦輅初停白晝長

其二

月出王孫獵兔忙  
玉驄拾矢戲沙場  
皮囊乳酒鑼鍋肉  
奴視山陰對角羊

出獵圖

元楊維禎

燕支花開春日暉從官遊騎去如飛分明一段龍沙景  
白鴈黃羊好打圍

御定佩文齋詠物詩選卷一百三十

欽定四庫全書

御定佩文齋詠物詩選卷一百三十一

征伐類

五言古

命將出征歌

晉張華

重華隆帝道戎蠻或不賓徐夷興有周鬼方亦達殷今  
在聖明世寇虐動四垠豹狼染牙爪羣生號穹旻元帥  
統方夏出車撫涼秦衆貞必以律臧否實在人威信加

殊類疎逃思自親單醪豈有味挾纊感至仁武功尚止  
戈七德美安民遠跡由斯舉永世無風塵

北伐

宋武帝

表裏跨原隰左右御川梁月羽皎素魄星旗艷赤光

出重圍和傳昭

梁沈約

魯連揚一策陳平出六奇邯鄲風雨散白登煙霧維排  
雲出九地陵定振五危

從駕送軍

陳沈炯



惟堯稱乃武軒后號神兵弔民資智勇治忽屬師貞我  
君膺寶業歷駕視前英蒲海方無浪夷山未有平星光  
下結旆劍氣上舒精雲開萬里徹日麗百川明撫鼓山  
靈應詔蹕水祇驚

南征

陳蘇子卿

一朝遊桂水萬里別長安故鄉夢中近邊愁酒上寬劍  
鋒但須利戎衣不畏單南中地氣暖少婦莫愁寒

西征軍行遇風

唐崔融

北風捲塵沙左右不相識颯颯吹萬里昏昏同一色馬  
煩莫敢進人急未遑食草木春更悲天景畫相匿風齡  
慕忠義雅尚存孤直覽史懷浸驕讀詩歎孔棘及茲戎  
旅地忝從書記職兵氣騰北荒軍聲振西極坐覺威靈  
遠行看氛祲息愚臣何以報倚馬申微力

征東至淇門答宋參軍之問

唐陳子昂

南星中大火將子涉清淇西林改微月征師空自持碧  
潭去已遠瑤華折遺誰若問遼陽戍悠悠天際旗

貽鼓吹李丞時信安王北伐李公王之所器者

唐儲光義

北伐昧天造王師示有征轅門統元律帝室命宗英靈  
威方首事仗鉞按邊城膏雨被春草黃雲浮太清文儒  
託後乘武旅趨前旌出車發西洛營軍臨北平曰子深  
固陋志氣頗縱橫常思驃騎幕願逐嫖姚兵惟賢美無  
度海內依揚聲河間舊相許車騎日逢迎折節下謀士  
深心論客卿忠言雖未列庶以知君誠

七言古

走馬川行奉送出師西征

唐岑參

君不見走馬川行雪海邊  
平沙莽莽黃入天  
輪臺九月風夜吼  
一川碎石大如斗  
隨風滿地石亂走  
塞上草黃馬正肥  
金山西見煙塵飛  
漢家大將西出師  
將軍金甲夜不脫  
半夜軍行戈相撥  
風頭如刀面如割  
馬毛帶雪汗氣蒸  
五花連錢旋作冰  
幕中草檄硯水凝  
敵騎聞之心膽懾  
料知短兵不敢接  
車師西門佇獻捷

五言律

送著作佐郎崔融等從梁王東征

唐陳子昂

金天方肅殺，白露始專征。  
王師非樂戰，之子慎佳兵。  
海氣侵南部，邊風掃北平。  
莫賣盧龍塞，歸邀麟閣名。

送白利從金吾董將軍西征

唐李白

西羗延國討，白起佐軍威。  
劒決浮雲氣，弓彎明月輝。  
馬行邊草綠，旗捲曙霜飛。  
抗手凜相顧，寒風生鐵衣。

征西將

唐張籍

黃沙北風起半夜又翻營戰馬雪中宿探人冰上行深  
山旗未展陰磧鼓無聲幾道征西將同收碎葉城

誓師畢隨駕回營中馬上賦

明金幼孜

萬里陰山道平原入望賒天營高日月輦路淨風沙寶  
馬銜金勒蒼龍繞翠華陽和隨處滿草色徧天涯

五言排律

夏日都門送司馬員外逸客孫員外佺北征

唐  
李 乂

日逐滋南寇，天威撫北陲。  
折珪行仗節，持印且分麾。  
羽檄雙鳬去，兵車駟馬馳。  
虎旗懸氣色，龍劍抱雄雌。  
鳴候月期戡，翦經時念別。  
離坐聞關隴，外無復引弓兒。

奉和幸望春宮送朔方軍大總管張仁亶

李 乂

邊郊草具腓，河塞有兵機。  
上宰調梅寄，元戎細柳威。  
虎貔東道出，鷹隼北庭飛。  
玉匣謀中野，金輿下太微。  
投醪

銜錢酌緝衮事征衣勿謂公孫老行聞奏凱歸

送趙二尚書彥昭北伐

唐張說

朔地河水合邊城備此時兵連紫塞路將舉白雲司提  
劒榮中貴銜珠盛出師日華光組練風色焰旌旗投筆  
尊前起橫戈馬上辭梅花吹別引楊柳賦新詩

送梁公昌從信安王北征

唐李白

入幕推英選捐書事遠戎高談百戰術鬱作萬夫雄起  
舞蓮花劒行歌明月宮將飛天地陣兵出塞垣通祖席



留丹景征麾拂綵虹旋應獻凱入麟閣佇深功

七言律

行次昭應縣道上送戶部李郎中充昭義攻討

唐李商隱

將軍大旆掃狂童  
詔選名賢贊武功  
暫逐虎牙臨故絳  
遠含雞舌過新豐  
魚遊沸鼎知無日  
鳥覆危巢豈待風  
早勒勲庸燕石上  
佇光綸綍漢庭中

次韻贈張省史從軍南征  
元張憲

震天金鼓紫駝橋  
阜隸連珠畫斗杓  
甲馬魚鱗開曉日  
錦袍花萼上春潮  
枕擲雨暗湯泉溢  
萊利風暄海瘴消  
幕下何人專草檄  
共誇謀議得張昭

送御史大夫鄧公西征

明 朱弘祖

今代麒麟第一功  
從龍飛渡大江東  
彤弓錫寵專征伐  
鐵券銘勲誓始終  
龍虎親軍遙動地  
鳳凰臺閣遠生風  
不知幙下誰叅佐  
珠履三千盡石洪

三月十七日送駕出德勝門

明 梁潛

煌煌旄鉞發平明  
萬里河山錦繡迎  
王氣浮天隨寶蓋  
虹光拂地護龍旌  
玉關指日看歸馬  
青海無波待洗兵  
萬姓歡呼傳捷報  
六軍歌舞入瑤京

送胡學士楊金二侍講扈駕北伐

明黃守

六師北伐繞龍城  
遙羨詞臣扈蹕行  
兵略曾從圯上得  
檄書多向御前成  
黃沙白草雲隨馬  
畫戟雕戈雪照營  
應想居庸關外路  
東風歸旆凱歌聲

嘉靖四年奉詔督師西征再蒙溫旨有趙充國

馬援之褒感而有述

明楊一清

西北風塵帝顧多老臣承詔出巖阿便宜欲上趙充國  
矍鑠還非馬伏波十乘戎行新節鉞三邊精采舊關河  
極知君命如山重感激渾忘兩鬢皤

夜坐念東征將士

明陸深

長河乘夜渡駝貅兵氣如雲擁上浮大將能揮白羽扇  
君王不愛紫貂裘十二關山齊故國百年疆域漢神州

不眠霜月聞刁斗自啟茅堂望斗牛

七言絕句

奉和裴相公東征途經女几山下作

唐韓愈

旗穿曉日雲霞雜山倚秋空劒戟明  
敢請相公平賊後暫携諸吏上崢嶸

南征行

明程誥

新河命將出屯營畫戟雕弓耀日明  
洗馬真臨江漢水

擒蛟空擣豫章城

御定佩文齋詠物詩選卷一百三十一

欽定四庫全書

御定佩文齋詠物詩選卷一百三十二

從軍類

五言古

和王僧辯從軍

梁元帝

寶劒飾龍淵長虹畫彩旃  
山虛和鏡管水淨寫樓船  
連雞隨火度燧象帶烽然  
洞庭曉風急瀟湘夜月圓  
荀令多文藻臨戎賦雅篇

從軍五更轉五首

陳伏知道

一更刁斗鳴校尉連連城遙聞射鴈騎懸憚將軍名

其二

二更愁未央高城寒夜長試將弓學月聊持劍比霜

其三

三更夜警新橫吹獨吟春彊聽梅花落誤憶柳園人

其四

四更星漢低落月與雲齊依稀北風裏邊笳雜馬嘶



其五

五更催送籌曉色映山頭城烏初起堞更人悄下樓

從軍行

隋明餘慶

三邊烽火驚十萬且橫行風卷常山陣笳喧細柳營劒  
花寒不落弓月曉逾明會取淮南地持作朔方城

送裴四判官赴河西軍試

唐劉長卿

吏道豈易愜如君誰與儔逢時將騁驥臨事無全牛鮑  
叔宰相知田蘇頗同遊英資挺孤秀清論含古流出塞

佐持簡辭家擁鳴騶憲臺貴公舉幕府資良籌武士佇  
明試皇華難久留陽關望天盡洮水令人愁萬里看一  
鳥曠然煙霞收晚花對古戍春雪含邊州道路難暫隔  
音塵那可求他時相望處明月西南樓

從軍行

唐  
戴叔倫

丈夫四方志結髮事遠遊遠遊歷燕薊獨戍邊城陬西  
風隴水寒明月關山愁酬恩仗孤劍十年敝貂裘封侯  
屬何人蹉跎雪盈頭老馬思故櫪窮鱗憶深流彈鋏動

深慨浩歌氣橫秋報國期努力功名良見收

送韓愈從軍

唐孟郊

志士感恩起變衣非變性親賓改舊觀僮僕生新敬坐  
作羣書吟行為孤劍詠始知出處心不失平生正淒淒  
天地秋凜凜軍馬令驛塵時一飛物色極四靜王師既  
不戰廟略在無競王粲有所依元瑜初應命一章喻檄  
明百萬心氣定今朝旌鼓前笑別丈夫盛

前出軍

元張翥

前軍紅衲袍朱絲繫彭排後軍細鎧甲白羽攢鞬輶  
車左右馳萬馬擁長街送行動城郭斗酒飲同儕壯士  
當報國母為故鄉懷

羽林子

明徐有貞

珠袍年少子名冠羽林中獨佩流星劍雙懸明月弓陪  
遊向何處還入華清宮

其二

羽箭插腰間驛弓臂上彎自來從日馭常得近天顏借

問歸何晚長楊射獵還

五言律 附小律

從軍行

唐楊炯

烽火照西京心中自不平  
牙璋辭鳳闕鐵騎繞龍城  
雪暗凋旗畫風多雜鼓聲  
寧為百夫長勝作一書生

送崔融

唐杜審言

君王行出將書記遠從征  
祖帳連河關軍麾動洛城  
旌旗朝朔氣笳吹夜邊聲  
坐覺煙塵掃秋風古北平

送人隨大夫和蕃

唐 儲光羲

西方有六國國國願來賓聖主今無外懷柔遣使臣大  
夫開幕府才子作行人解劍聊相送邊城二月春

少年行

唐 李 嶷

十八羽林郎戎衣侍漢王臂鷹金殿側挾彈玉輿傍馳  
道春風起陪遊出建章

其二

侍獵長楊下承恩更射飛塵生馬影滅箭落鴈行稀薄

暮隨天仗聯翩入瑣闌

送戴迪赴鳳翔幕府

唐韓翃

青春帶文綬去事魏征西上路金羈出中人玉筋齊當  
歌酒萬斛看獵馬千蹄自有從軍樂何須怨解攜

送楊從事從軍

明高啟

南風薰燕麥送子悵如何迢遞從軍役淒涼橫笛歌天  
籠平野迴山繞古關多莫笑書生怯能當曳落河

五言排律

賦送劉校書從軍之湟中幕府

唐楊炯

天將下三宮星門召五戎坐謀資廟略飛檄佇文雄赤  
土流星劒烏號明月弓秋陰生蜀道殺氣繞湟中風雨  
何年別琴樽此日同離亭不可望溝水自西東

送駱奉禮從軍

唐李嶠

玉塞邊烽舉金壇廟略申羽書資銳筆戎幕引英賓劒  
動三軍氣衣飄萬里塵琴樽留別賞風景惜離晨笛梅



含晚吹營柳帶餘春  
希君勒石返歌舞入城闔

七言律

送客往鄜州

唐楊凝

新參將略事營平  
錦帶驛弓結束輕曉上  
關城吟畫角  
暗馳羗馬發支兵  
回中地遠風常急  
鄜時年多草自生  
近喜扶陽係戎相  
從來衛霍笑長纓

送侯判官赴廣州從軍

唐張籍

年少才高求自展  
將身萬里赴軍門  
辟書遠到開呈客

公服新成著謝恩驛舫過江分白候戍亭當嶺見紅旂  
海花蠻草連冬有行處無家不滿園

送阿勒坦布哈萬戶湖廣赴鎮

元納延

三品新除萬戶侯紅旗照海出皇州腰間寶帶懸金虎  
馬上春衫繡玉虬水落張帆遊夢澤月明撾鼓過南樓  
書生最喜從軍樂何日轅門借箸籌

五言絕句

從軍行

唐王維

燕領多奇相狼頭敢犯邊  
寄言班定遠正是立功年

從軍行

唐令狐楚

却望冰河濶前登雪嶺高  
征人幾多在又擬戰臨洮

七言絕句

從軍行

唐王昌齡

青海長雲暗雪山孤城遙望玉門關  
黃沙百戰穿金甲不破樓蘭終不還

其二

大漠風塵日色昏  
紅旗半捲出轅門  
前軍夜戰洮河北  
已報生擒吐谷渾

其三

玉門山嶂幾千重  
山北山南總是烽  
人依遠戍須看火  
馬踏深山不見蹤

出軍

唐戎昱

龍繞旌竿獸滿旗  
翻營乍似雪山移  
中軍一隊三千騎  
盡是并州遊俠兒

從軍行

唐陳羽

海畔風吹凍泥裂  
枯桐葉落枝梢折  
橫笛聞聲不見人  
紅旗直上天山雪

從軍行

唐蔣山卿

雪嶺寒雲凍不飛  
黃沙白草路人稀  
邊城春色惟看柳  
看到青時春已歸

御定佩文齋詠物詩選卷一百三十二

欽定四庫全書

御定佩文齋詠物詩選卷一百三十三

出塞類

五言古

關山月

梁元帝

朝望清波道夜上白登臺月中含桂樹流影自徘徊寒  
沙逐風起春花犯雪開夜長無與晤衣單誰為裁

出塞

梁劉峻

薊門秋氣清飛將出長城絕漠衝風急交河夜月明陷  
敵撻金鼓摧鋒揚旆旌去去無終極日暮動邊聲

入塞

隋  
何妥

桃林千里險候騎正紛紛問此將何事嫖姚封冠軍回  
旌引流電歸蓋轉行雲待任蒼龍傑方當論次勲

出塞

隋  
虞世基

上將三略遠元戎九命尊緬懷古人節思酬明主恩山  
西多勇氣塞北有遊魂楊枹上隴坂勒騎下平原誓將



絕沙漠悠然去玉門輕齋不遑舍驚策驚戎軒凜凜邊  
風急蕭蕭征馬煩雪暗天山道冰塞交河源霧烽黯無  
色霜旗凍不翻耿介倚長劒日落風塵昏

塞下曲

唐王昌齡

蟬鳴桑樹間八月蕭關道出塞復入塞處處黃雲草從  
來幽并客皆共塵沙老莫學游俠兒矜誇紫騮好

後出塞

唐杜甫

男兒生世間及壯當封侯戰伐有功業焉能守舊丘召

募赴薊門軍動不可留千金買馬鞍百金裝刀頭閭里  
送我行親戚擁道周斑白居易上列酒酣進庶羞少年別  
有贈含笑看吳鉤

其二

朝進東門營暮上河陽橋落日照大旗馬鳴風蕭蕭平  
沙列萬幕部伍各見招中天懸明月令嚴夜寂寥悲笳  
數聲動壯士慘不驕借問大將誰恐是霍嫖姚

塞下曲

唐  
李  
頎

黃雲鴈門郡日暮風沙裏千騎黑貂裘皆稱羽林子金  
笳吹朔雪鐵馬嘶雲水帳下飲蒲萄平生寸心是

七言古

送渾將軍出塞

唐高適

將軍族貴兵且強漢家已是渾邪王子孫相承在朝野  
至今部曲燕支下控弦盡周陰山兒登陣長騎大宛馬  
銀鞍玉勒繡螭弧每逐嫖姚破骨都李廣從來先將士  
衛青未肯學孫吳傳有沙場千萬騎昨日邊庭羽書至

城頭畫角三四聲匣裏寶刀晝夜鳴意氣能甘萬里去  
辛勤動作一年行黃雲白草無前後朝建旌旄夕刁斗  
塞下應多俠少年關西不見春楊柳從軍借問所從誰  
擊劍酣歌當此時遠別無輕繞朝策平戎早寄仲宣詩

盧龍塞行送韋掌記

唐錢起

雨雪紛紛黑山外行人共指盧龍塞萬里飛沙咽鼓鼙  
三軍殺氣凝旌旆陳琳書記本翩翩料敵張兵奪酒泉  
聖主好文兼好武封侯莫比漢皇年

五言律

出塞

唐楊炯

塞外欲紛紜，雌雄猶未分明。  
堂占氣色華蓋辨，星文二月河魁將。  
三千太乙軍，丈夫皆有志。會見立功勲。

度關山

唐鄭錫

象弭插文犀，魚腸鑿鷓鴣。  
水聲分隴咽，馬色度關迷。  
曉幕寒沙慘，危峰漢月低。  
仍聞數騎將，更欲出遼西。

塞下曲

唐霍總

魯當一面戰頻出九重圍但見爭鋒處長須得勝歸雪  
沾旗尾落風斷節毛稀豈要銘燕石平生重武威

塞上曲

元王逢

將令傳中間交驩決兩軍地形龍虎踞陣伍烏蛇分清  
野輝燕日黃河瀉岱雲生靈如有賴絳灌不無文

其二

倏草帶鈎膺聯鑣獵楚陵白肥霜後兔青沒海東鷹千  
里榛蕪闢三年秬穀登中郎示閒暇呼酒出房蒸

五言排律

和陸明府贈將軍重出塞

唐陳子昂

忽聞天上將闕塞重橫行始返樓蘭國還向朔方城黃  
金裝戰馬白羽集神兵星月開天陣山川列地營晚風  
吹畫角春色耀飛旌寧知班定遠猶是一書生

塞外

唐鄭 愔

塞外蕭條望征人此路賒邊聲亂朔馬秋色引寒笳遙  
障侵歸日長城帶晚霞斷蓬飛古戍連鴈聚寒沙海暗

雲無葉山春雪作花丈夫期報主萬里獨辭家

其二

荒壘三秋夕窮郊萬里平海陰凝獨樹日氣下連營戎  
旆霜疑重邊裘夜更輕將軍猶轉戰都尉不成名折柳  
悲春曲吹笳斷夜聲明年漢使返須築受降城

七言律

出塞

明戚繼光

鬱葱千里綠陰肥澗水縈紆一徑微魚為驚鉤聞鼓動



鳥因避幟傍人飛江南塞北何相似并郡桑乾總未歸  
惆悵十年成底事獨將羸馬立斜暉

五言絕句

隴上行

唐王維

負羽到邊州鳴笳度隴頭雲黃知塞近草白見邊秋

和張僕射塞下曲

唐盧綸

驚翎金僕姑燕尾繡蝥弧獨立揚新令千營共一呼

其二

林暗草驚風將軍夜引弓  
平明尋白羽沒在石稜中

其三

野幕敞瓊筵羗兒賀勞旋  
醉和金甲舞雷鼓動山川

其四

亭亭七葉貴蕩蕩一隅清  
他日題麟閣唯應獨不名

塞下曲

明謝榛

飄蓬燕趙間行李風霜下  
蘆管送邊聲空林一駐馬

其二

塞上黃鬚兒飲馬黑山澗  
彎弧向朔雲莫射南飛雁

七言絕句

出塞

唐王昌齡

騶馬新跨白玉鞍  
戰罷沙場月色寒  
城頭鐵鼓聲猶振  
匣裏金刀血未乾

塞上曲

唐王烈

紅顏歲歲老金微  
沙磧年年卧鐵衣  
白草城中春不入  
黃花戍上鴈長飛

其二

孤城夕對戍樓閒  
廻合青冥萬仞山  
明鏡不須生白髮  
風沙自解老紅顏

邊詞

唐張敬宗

五原春色舊來遲  
二月垂楊未挂絲  
即今河畔冰開日  
正是長安花落時

水鼓子第一曲

唐張子容

雕弓白羽獵初回  
薄夜牛羊復下來  
夢水河邊青草合

黑山峰外陣雲開

塞上曲

金元好問

平沙細草散羊牛  
幾簇征人在戍樓  
忽見隴頭新鴈過  
一時回首望南州

塞上曲

元納延

秋高沙磧地椒稀  
貂帽狐裘晚出圍  
射得白狼懸馬上  
吹笳夜半月中歸

其二

馬乳新桐玉滿鉸沙羊黃鼠割來腥踏歌盡醉營盤晚  
鞭鼓聲中按海青

塞上謠

元張昱

雖說灤京是帝鄉三時閒靜一時忙駕來滿眼吹花柳  
駕起連天降雪霜

塞下曲

明謝榛

青海城邊秋草稀黃沙磧裏夜雲飛將軍不寐聽刁斗  
月上轅門探馬歸

出塞行送郭建初歸戚都護幕中


明  
黃克晦

鑠甲搖華鐵戟寒  
弦弓插羽上雕鞍  
班超自有封侯骨  
世業寧論是史官

後出塞

明  
陳第

萬里秋風海上生  
驅車今復戍檀城  
天寒夜度韋溝水  
馬尾凝冰碎有聲



御定佩文齋詠物詩選卷一百三十三



# 欽定四庫全書

集部

御定佩文齋詠物詩選卷百

三十四至五十六

詳校官侍郎<sub>臣</sub>李封

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>楊世綸

謄錄監生<sub>臣</sub>顧永涵

欽定四庫全書

御定佩文齋詠物詩選卷一百三十四

告捷類

五言古

奉和平鄴應詔

北周庾信

天策引神兵風飛掃鄴城陣雲千里散黃河一代清

執契靜三邊

唐太宗

執契靜三邊持衡臨萬姓玉彩輝闕燭金華流日鏡無

為宇宙清有美璇璣正皎佩星連景飄衣雲結慶戢武  
榮七德昇文輝九功煙波澄舊碧塵火息前紅霜野韜  
蓮劒關城罷月弓錢綴榆天合城新柳塞空花銷葱嶺  
雪穀盡流沙霧秋駕轉兢懷春冰彌軫慮書絕龍庭羽  
烽休鳳穴戍衣宵寢二難食盱食三懼翦暴興先廢除  
允存昔亡圖蓋歸天壤方輿入地荒乳海池京邑雙河  
治帝鄉循躬思勵已撫俗愧時康元首佇鹽梅股肱惟  
輔弼羽賢崆嶺四翼聖襄城七澆俗庶反淳替文聊就

質已知隆至道共歡區宇一

奉和行經破薛舉戰地應制

唐許敬宗

混元分大象長策挫修鯨於斯建宸極由此創鴻名一  
戎乾宇泰千祀德流清垂衣凝庶績端拱鑄羣生復整  
瑤池駕還臨官渡營周游尋曩跡曠望動天情帷宮面  
丹浦帳殿矚宛城沙場棲九穗前歌被六英戰地甘泉  
湧陣處景雲生普天沾凱澤相携欣頌平

還至張掖古城聞東軍告捷贈韋五虛已

唐陳子昂

孟秋首歸路仲月旋邊亭聞道蘭山戰相邀在井陘屢  
鬪關月滿三捷塞雲平漢軍追北地寇騎走南庭君為  
幙中士疇昔好言兵白虎鋒應出青龍陣幾成披圖見  
丞相按節入咸京寧知玉門道翻作隴西行北海朱旄  
落東歸白露生縱橫未得意寂寞寡相迎負劒空歎息  
蒼茫登古城

七言古

殷司馬平廣西寇歌

明王世貞

殷公文武邦之楨不學淵源空有名一歲再遷中執法  
兼提六管領南兵如雲鵝鵲排千艦五色神羊映百城  
征南將軍不穿札渡瀘相公單白恰軍聲雷動細柳營  
殺氣霜凋大藤峽任是蠻煙開羽扇還為漢雨澆金甲  
狼兵錦韞繡螫弧奪得生徭換酒沽早知不殺稱神武  
悔自跳踉作後夫處處春田催布穀朝朝列肆呼提壺  
千秋獲嘉縣重覩伏波不得驕銅柱灘水灘和鏡吹聲

鬱林花滿旌旗路遙望蒼梧雲正蒼是公功成勒銘處

五言律

太社觀獻捷

唐白居易

淮海妖氛滅乾坤喜氣通班師郊社內操袂凱歌中廟  
算無遺策天兵不戰功小臣同鳥獸率舞向皇風

五言排律

河中獻捷

唐張隨

叛將忘恩久王師不戰通凱歌千里內喜氣二儀中寇

盡條山下兵迴漢苑東將軍初執訊明主欲論功落日  
煙塵靜寒郊壁壘空蒼生幸無事自此樂堯風

七言律

奉使還途中聞東征捷音

明孫炎

南來萬里淨邊塵銜璧歸朝盡大臣城上玉繩浮婺女  
帳前銀甲擁天人出師已略扶桑國奉使須通析木津  
遂有江黃幕中夏可無書檄諭全閩

聞狼山捷

明李東陽



北風吹捲洞庭波飛舸還經孟瀆河今日勝兵方有算  
向來遺孽本無多中宵驛使傳書捷兩岸歡聲入棹歌  
聞說西南猶轉戰幾時甘雨洗天戈

七言排律

寄賀田侍中東平功成

唐王建

使迴高品滿城傳親見沂公在陣前百里旗旛衝即斷  
兩重衣甲射皆穿探知檢點兵應怯算得新移柵未堅  
營被數驚乘勢破將經頻敗遂生全密招殘寇防人覺

遙斬元兇恐自專  
首讓諸軍無敢近  
功歸部曲不爭先  
開通州縣斜連海  
交割山河直到燕  
戰馬散驅還逐草  
肉牛齊放却耕田  
府中獨拜將軍貴  
門下無分宰相權  
唐史上頭功第一  
春風雙節好朝天

七言絕句

姚林夜賀晉公

唐韓愈

西來騎火照山紅  
夜宿桃林臘月中  
手把命珪兼相印  
一時重疊賞元功

御定佩文齋詠物詩選卷一百三十四

欽定四庫全書

御定佩文齋詠物詩選卷一百三十五

凱旋類

五言古

正陽堂宴勞凱旋

梁沈約

凱入同高宴飲至均多祐昔往歌采薇今來歡杖杜善  
戰惟我皇勝之不窺戶推轂授神謨餘壯終能賈浩蕩  
金壘溢周流玉觴傳

光華殿侍宴賦競病韻

梁曹景宗

去時兒女悲歸來笳鼓競借問行路人何如霍去病

七言古

破陣曲

宋劉克莊

黃旗一片邊頭回兩河百郡送款來至尊御殿受捷奏  
六軍張凱聲如雷元戎劒履雲臺上麾下偏裨皆將相  
腐儒筆力尚跌宕燕山之銘高十丈

費將軍凱還歌

明黃哲

費侯佐國文且武禮樂從容在軍旅漢家卿相誰得如  
雲臺功臣祭征虜王師轉戰下山東大將平燕無限功  
復有奇兵專節制將軍同日度居庸居庸城邊草初白  
戎兵夜遁龍沙北長風吹沙鐵山黑賢王琱弓控不得  
組練如霜未倒戈狼烽斥堠通灤河將軍洗兵河上波  
馬前雙吹金唢囉英雄如公信無敵據鞍歸來親草檄  
歸來更唱平戎歌燕然山頭堪勒石忽憶去年駐阿城  
僕忝微官曾送迎馬頭北去掃燕土今日傳聞朝玉京

旌麾再入阿亭路橫槩賦詩官相顧官橋一道野棠開  
人道當時列營處東風二月江南春露布先傳到紫宸  
丹書鐵券分茅土顧爾功成過古人

五言律

侍宴旋師喜捷應制

唐韋安石

蜂蟻屯夷落熊羆逐漢飛忘軀百戰後屈指一年歸  
厚眷紆天藻深慈解御衣興酣歌舞出朝野羨光輝

五言排律

軍師凱旋自邕州順流舟中

唐李嶠

鳴鞞入嶂口汎舸歷川湄尚想江陵陣猶疑下瀨師岸  
迴帆影疾風逆鼓聲遲萍葉沾蘭橈林花拂桂旗弓鳴  
蒼隼落劒動白猿悲芳樹吟羗管幽篴入楚詞全軍多  
勝策無戰在明時寄謝山東妙長纓徒自欺

七言律

晉公破賊回重拜台司以詩示幕中賓客

唐韓愈



南伐旋師太華東天書夜到冊元功將軍舊壓三司貴  
相國新兼五等崇鸛鷺欲歸仙仗裏熊羆還入禁營中  
長慚典午非材職得就閒官即至公

大將軍徐丞相平定中原振旅還朝上御龍江

亭命儒臣賦詩迎之應制

明魏觀

白旄黃鉞兩京平甘雨和風四海清師出萬全非用武  
將資三傑在推誠蒼龍挾雨迎車騎彩鳳穿雲送旆旌  
獻頌偶蒙天一笑行看作樂著功成

大駕北還

明  
蔡羽

鑾輿北渡五雲移，親聽鐃歌海上吹。  
黃道香風鳴寶鉦，翠華秋日到瑤池。  
千官喜得金門詔，南國新傳赤鴈詩。  
六郡良家齊解甲，騶虞旗卷犒王師。

五言絕句

戰勝樂

唐  
徐彥伯

百戰得功名，天兵意氣生。  
三邊永不戰，此是我皇英。

平蕃曲

唐  
劉長卿

吹角報蕃營回軍欲洗兵已教青海外自築漢家城

其二

絕漠大軍還平沙獨戍閒空畱一片石萬古在燕山

凱樂歌詞

唐  
劉禹錫

受律辭元首相將討叛臣咸歌破陣樂共賞太平人

其二

聖德期昌運雍熙萬寓清乾坤資化育海嶽共休明

其三

闢土欣耕稼銷戈遂偃兵殊方歌帝澤執贄賀昇平

其四

四海皇風被千年德水清戎衣更不著今日告功成

其五

主聖開昌厯臣忠奉大猷君看偃草後更是太平秋

七言絕句

獻封大夫破播仙凱歌

唐岑參

漢將承恩西破戎捷書先奏未央宮天子預開麟閣待

祇今誰數貳師功

其二

官軍西出過樓蘭營幕傍臨月窟寒蒲海曉霜凝馬尾  
蔥山夜雪撲旗竿

其三

鳴笳疊鼓擁回軍破國平蕃昔未聞大夫鵲印搖邊月  
天將龍旗掣海雲

其四

日落轅門鼓角鳴  
千羣面縛出蕃城  
洗兵魚海雲迎陣  
秣馬龍堆月照營

其五

暮雨旌旗濕未乾  
龍沙白草日光寒  
昨夜將軍連曉戰  
蕃軍只見馬空鞍

邠州詞獻高尚書

唐李涉

將家難立是威聲  
不見多傳衛霍名  
一自元和平蜀後  
馬頭行處即長城

其二

朔方忠義舊來聞盡是邠城父子軍  
今日兵符歸上將旄頭不用更妖氛

田侍郎歸鎮

唐王建

去處長將決勝籌回回身在陣前頭  
賊城破後先鋒入看著紅粧不敢收

其二

慰帖朝衣拋戰袍  
夔龍班裏侍中高  
對時先奏牙門將

次第天恩與節旄

其三

踏著家鄉馬脚輕  
暮山秋色眼前明  
老人上酒齊頭拜  
得侍中來盡再生

其四

功成誰不用蕃方  
富貴還須是本鄉  
萬里雙旌汾水上  
玉鞭遙指白雲莊

其五



鼓吹旗旛道兩邊行男走女喜駢聞舊交省得當時別  
指點如今却少年

其六

廣場破陣樂初休彩纛高於百尺樓老將氣雄爭起舞  
管絃迴作大纏頭

其七

將士請衣忘却貧綠窓紅燭酒樓新家家盡踏還鄉曲  
明月街中不絕人

大駕西狩還京百官出候於德勝門

明陳沂

直望氤氲紫霧遙萬重飛鞚馬蕭蕭鵷班虎隊皆戎服  
兩度迎鑾德勝橋

其二

逐隊緋袍引上公當街行酒獻成功人人識得君王喜  
醉入仙桃兩朶紅

龕山凱歌

明徐渭

短劍隨鎗暮合圍  
寒風吹血著人飛  
朝來道上看歸騎  
一片紅冰冷鐵衣

其二

七尺龍蟠阜線絛  
倭兒刀挂漢兒腰  
向誰手內親拊得  
百徧衝鋒滾海蛟

御定佩文齋詠物詩選卷一百三十五

欽定四庫全書

御定佩文齋詠物詩選卷一百三十六

行營類

五言律

送南特進赴歸行營

唐劉長卿

聞道軍書至揚鞭不問家  
塞雲連白草漢月到黃沙  
汗馬河源飲燒羗隴坻遮  
翩翩新結束去逐李輕車

送鄭正則徐州行營

唐郎士元

從軍非隴頭師在古徐州氣勁三河卒功全萬戶侯元  
戎閩外略才子握中籌莫聽關山曲還生塞上愁

送李侍御赴徐州行營

唐韓翃

少年兼柱史東至舊徐州遠屬平津閣前驅博望侯向  
營淮月滿吹角楚天秋客夢依依處寒山對白樓

行營漫興

明茅大方

北地得春晚蕭關積雪多風雲驅部伍旄纛徧山河  
羌笛翻邊調秦兵雜楚歌漢家飛將在不必問廉頗

五言排律

宿溫城望軍營

唐駱賓王

邊地寒膠折，孤城夜柝聞。  
兵符關帝闕，天策動將軍。  
塞靜胡笳徹，沙明楚練分。  
風旗翻翼影，霜劍轉龍文。  
白羽搖如月，青山斷若雲。  
煙疎疑卷幔，塵滅似銷氛。  
投筆懷班業，臨戎想召勲。  
還應雪漢耻，持此報明君。

奉餞郎中四兄罷餘杭太守承恩加侍御史充  
行軍司馬赴汝南行營

唐劉長卿

星使三江上天波萬里通權分金節重恩借鐵冠雄梅  
吹前軍發棠陰舊府空殘春錦障外初日羽旗東岸柳  
遮浮鷁江花隔避驄離心在何處芳草滿吳宮

送李傅侍郎劍南行營

唐賈島

走馬從邊事新恩受外臺勇看雙劍出期破八蠻回許  
國家無戀盤江棧不推移軍刀斗逐報捷劍門開角咽  
彌候叫輦乾霹靂來去年新甸邑猶滯佐時才

營中閒夜

明唐之淳

閒坐樂從戎將軍得上公佩刀懸玉虎釭燼剔金蟲遠  
析微侵月清笳迥帶風香騰爐面紫火射箭頭紅舞劍  
知書法談碁識戰功明朝當閱武傳令選琯弓

七言律

得柳員外書封寄近詩書中無報新主行營兵  
馬因代書戲答

唐獨孤及

郎官作掾心非好儒服臨戎政已聞說劍嘗宗漆園吏  
戒嚴應笑棘門軍遙知抵掌論皇道時復吟詩向白雲



百越待君言即叙相思不敢愴離羣

七言絕句

賀州宴行營回將

唐羊士諤

丸劍盈庭酒滿卮  
戍人歸日及瓜時  
元戎靜鎮無邊事  
盡道營中偃畫旗

蘄州行營作

唐戴叔倫

蘄水西城向北看  
桃花落盡柳花殘  
朱旗半捲山川小  
白馬連嘶草樹寒

行營送人

唐劉商

鞞鼓喧喧對古城，獨尋歸鳥馬蹄輕。  
回來看覓鸞飛處，即是將軍細柳營。

春日行營即事

劉商

風引雙旌馬首齊，曹南戰勝日平西。  
為儒不解從戎事，花落春深聞鼓鼙。

宣府教場歌

明徐渭

宣府教場天下聞，箇箇峰巒尖入雲。  
不用弓刀排虎士，

天生劔戟擁將軍

御定佩文齋詠物詩選卷一百三十六

欽定四庫全書

御定佩文齋詠物詩選卷一百三十七

陣圖類

五言古

八陣圖

晉桓溫

望古識其真  
臨源愛往跡  
恐君遺事節  
聊下南山石

五言律

觀八陣圖

唐劉禹錫

軒皇傳上略蜀相運神機水落龍蛇出沙平鵝鶴飛波  
濤無動勢麟介避餘威會有知兵者臨岐指是非

五言絕句

八陣圖

唐杜甫

功蓋三分國名成八陣圖江流石不轉遺恨失吞吳

御定佩文齋詠物詩選卷一百三十七

欽定四庫全書

御定佩文齋詠物詩選卷一百三十八

射類

五言古

北園射堂新成

北周  
庾信

軒臺聊可習仙的不難登轉箭初調筈橫弓先望墉驚  
心一鴈落連辟兩猿騰直知王濟巧誰覺魏舒能空心  
不死樹無葉未枯藤擇賢方至此傳卮欣得朋

題君子亭

宋 朱子

清晨坐武觀涼風動高旌挾弓一笑起屈此四座英破  
的亦已屢穿楊詎云精軍吏不敢賀高鳥時相驚解韝  
脫決遂緩帶飄華纓俯仰新亭幽曠然塵慮清內正外  
自直三揖奚所爭端居得深玩君子非虛名

七言古

射虎行贈射虎人

元 郭鈺

昨日射虎南山顛悲風蕭蕭眼力穿今日射虎北山下

虎血濺衣山路夜朝朝射虎無空歸家人望斷孤雲飛  
度嶺踰山弓力健虎肉共分不辭遠府司帖下問虎皮  
高枕觸體醉不知虎昔咆哮百獸走今日寧知在君手  
鼻端出火耳生風拔劍起舞氣如虹昨夜空邨見漁火  
牛羊不收犬長卧作詩贈君毛髮寒煩君為我謝上官  
獨不見昔日劉昆稱長者虎北渡河不須射

端午賜觀騎射擊毬侍讌

明王紱

葵榴花開蒲艾香都城佳節逢端陽龍舟競渡不足尚



詔令禁籞開毬場  
毬場新開向東苑  
一望晴煙綠莎軟  
萬馬騫騰鼓吹喧  
五雲繚繞旌旗展  
羽林年少青綸巾  
秀眉豐臉如神人  
錦袍窄袖巧結束  
金鞍寶勒紅纓新  
紛紜來往尤迅速  
馬上時看藏馬腹  
背挽雕弓金鏃鳴  
一剪柔條碎新綠  
忽聞有詔命分棚  
毬先到手人誇能  
馬蹄四合雲霧集  
驪珠落地蛟龍爭  
彩色毬門不盈尺  
巧中由來如破的  
剗然一擊電光飛  
平地風雲轟霹靂  
自矜得雋意氣粗  
萬夫誇羨聲喧呼  
撻金伐鼓助喜色

共言此樂人間無，鸞輿臨幸天顏喜。  
讌賜千官醉蒲醕，光祿樽開北斗傍。  
簫韶樂奏南薰裏，微臣何幸遭盛明。  
清光日近多恩榮，呈詩敢擬長楊賦。  
萬歲千秋頌太平。

答空同子觀射見贈之作

明鄭作

我騎白鼻騮，君載青油車。  
行行城南道，聯翩走風沙。  
停車下馬對相揖，彎弓抽矢向西立。  
一箭應手墜雙翼，鏑中颯颯悲風入。  
天寒日暮侵征衣，側身上馬先爾歸。  
揚鞭徑去不回首，黃雲白雪春霏霏。

五言律

端午日觀射柳應制

明王直

楊柳綠含滋，  
琱弓縱射時。  
向風飛白羽，  
和露折青絲。  
輦路晴光動，  
旌門午漏遲。  
營前撾鼓急，  
捷報萬人知。

五言排律

元武門侍射

唐張說

射觀通元闕，  
兵欄闢御筵。  
雕弧月半上，  
畫的暈重圓。  
羿后神幽贊，  
靈王法暗傳。  
貫心精四返，  
飲羽妙三聯。  
雪鶴

來銜箭星麟下集弦一逢軍宴洽萬慶武功宣

和王懷州觀西營秋射

唐耿漳

謝公觀校武草碧露漫漫落葉停高駕空林滿從官迎  
籌皆疊鼓揮箭或移竿名借三軍勇功推百中難主皮  
山郡晚飲筭柳營寒明日開鈴閣新詩雙玉盤

觀衛尚書九日對中使射破的

唐戎昱

盛宴傾黃菊殊私降紫泥月營開射圃霜旆拂晴霓出

將三朝貴彎弓五善齊腕回金鏃滿的破綠弦低勇氣  
干牛斗歡聲震鼓輦忠臣思報國更欲取關西

七言律

次韻王晉卿奉詔押高麗燕射

宋  
蘇軾

北苑傳呼陞楯郎東藩初識令君香天山自可三箭取  
海國何勞一葦航宣勸不辭金盃側醉歸爭看玉鞭長  
錦囊詩草勤收拾莫遣雞林得夜光

劉乙新作射亭

蘇軾

蘭玉當年刺史家，雙韃馳射笑穿花。  
而今白首閒驄馬，只有清尊照畫蛇。  
寂寂小窗蛛網徧，陰陰垂柳鴈行斜。  
手柔弓燥春風暖，置酒看君中戟牙。

射柳

元張弘範

年少將軍耀武威，人如輕燕馬如飛。  
黃金箭落星三點，白玉弓開月一圍。  
簫鼓聲中驚霹靂，綺羅筵上動光輝。  
回頭笑殺無功子，羞對薰風脫錦衣。

端午日賜觀射柳

明王英

鳳皇城上駐龍旂，瑞日含光耀紫微。  
淡蕩蒲風初應節，綢繆花氣半薰衣。  
仗前新築麒麟苑，雲外遙開虎豹圍。  
先看聖孫來試馬，指麾兵陣合天機。

其二

鳴簫伐鼓催飛鞚，列陣行雲擁翠華。  
競挽雕弓如月滿，盡摧楊柳向風斜。  
因知上將皆猿臂，總道諸軍勝虎牙。  
莫羨天山曾獻巧，射生今已靜邊沙。

五言絕句

觀騎射

唐

李益

邊頭射鵬將走馬出中軍  
遠見平原上翻身向暮雲

七言絕句

少年行

唐

令狐楚

家本清河住五城須憑弓箭得功名  
等閒飛鞚秋原上獨向寒雲試射聲

看射柳枝

唐

李涉



玉弣朱弦勅賜弓新加三斗得秋風萬人齊看翻金勒  
百步穿楊逐箭空

御定佩文齋詠物詩選卷一百三十八

欽定四庫全書

御定佩文齋詠物詩選卷一百三十九

弓類

四言古

良弓銘

漢

李尤

弓矢之作爰自曩時鄉射載禮招命在詩妙稱顏高巧  
發晉師不爭之美亦以辨儀

五言古

我有

元 張憲

我有駢角弓百步能破的力強不受檠材美陋越棘時  
能斃飛將萬騎莫敢逼翻翻鐵絲箭剌剌金爪鎬鼓寒  
霜氣重應手響霹靂豈惟射渠魁眼中已無敵雄哉兩  
縶韉儼若左右翼時來亦大用不偶直暫塞我弓雖少  
置未許楚人得

五言律

戴光弓

唐 元稹

潞府筋膠勁戴光因合成知君懷膽氣贈我定交情不  
擬閒穿葉那能枉始生唯調一隻箭飛入破聊城

射弓次寄彭城四君

宋林逋

襟掩皂貂斜晴輦嚮水涯箭翎沈白雪貼暈破微霞氣  
為傍觀壯言因決勝誇鈿釵金捍轂更憶五侯家

五言絕句

奉和詠弓

唐楊師道

霜重麟膠勁風高月影圓烏飛隨帝輦鴈落逐鳴弦

弓

明高啓

燕角號良材，樓煩臂未開。  
秋風懸臂出，何處一鷁來。

七言絕句

閱弓箭手

明孫承宗

三年又見柳依依，細柳營中剗柳歸。  
却喜丹臺新燕子，學成白羽水平飛。

御定佩文齋詠物詩選卷一百三十九

欽定四庫全書

御定佩文齋詠物詩選卷一百四十

箭類

四言古

弧矢銘

漢

李尤

弦木為弧剡木為矢弧矢協并八極同紀

弓矢贊

梁

蕭統

弓用筋角矢製良工亦以觀德非止臨戎揚葉命中援

墮長空

五言律

箭

唐

李嶠

漢甸初收羽  
燕城忽解圍  
影隨流水急  
光帶落星飛  
夏列三成範  
堯沈九日輝  
斷蛟雲夢澤  
希為識志歸

五言排律

御箭連中雙兔

唐

闕名

宸遊經上苑  
羽獵向閒田  
狡兔初迷窟  
纖驪詎著鞭  
三

驅仍百步一發遂雙連影謝含霜草魂消向月弦歡聲  
動寒水喜氣滿晴天那似陳王意空垂樂府篇



欽定四庫全書

御定佩文齋詠物詩選  
卷一百四十

二

御定佩文齋詠物詩選卷一百四十

欽定四庫全書

御定佩文齋詠物詩選卷一百四十一

刀類

五言古

以雙刀遺子由子由有詩次其韻

宋  
蘇軾

寶刀匣不見但見龍雀鏤何曾斬蛟蛇亦未切琅玕胡  
為穿窬輩見之要領寒吾刀不汝問有媿在其肝念此

欽定四庫全書

御定極文齋詩集  
卷一百四十一

力自藏包之虎皮斑湛然如古井終歲不復瀾不憂無  
所用憂在用者難佩之非其人匣中自長歎我老衆所  
易屢遭非意干惟有王元通階庭秀芝蘭知子後必大  
故擇刀所便屠狗非不用一歲六七刈欲試百鍊剛要  
須更泥蟠作詩銘其背以待知者看

刀贈程自邑

明  
鄭作

昔客汴上來曾遺西番刀出鞘試齟齬口吹斷毫毛裏  
以白鹿皮纏以青絲絛不逢拂拭人塵埃甘自韜把贈

慙吾老功名看汝豪

七言古

附長短句

崔五六圖屏風各賦一物得烏孫佩刀

唐  
李頎

烏孫腰間佩兩刀  
刃可吹毛錦為帶  
握中枕宿穹廬室  
馬上割飛翳  
螭塞執之魍魎  
誰能前氣凜清風  
沙漠邊  
磨用陰山一片玉  
洗將朔北獨流泉  
主人屏風寫奇狀  
鐵鞘金鐶儼相向  
回頭瞪目時  
一看使予心在江湖上

荆南兵馬使太常卿趙公大食刀歌

唐  
杜甫

太常樓船聲嗷嘈問兵刮寇超下牢牧出令奔飛百艘  
猛蛟突獸紛騰逃白帝寒城駐錦袍元冬示我胡國刀  
壯士短衣頭虎毛憑軒拔鞘天為高翻風轉日木怒號  
冰翼雪淡傷哀猱鏑錯碧鬣鶚鵠膏銚鏑已瑩虛秋濤  
鬼物撇捩亂坑壕蒼水使者捫赤條龍伯國人罷釣鰲  
芮公回首顏色勞分閭救世用賢豪趙公玉立高歌起

攬環結佩相終始萬歲持之護天子得君亂絲與君理  
蜀江如線針如水荆岑彈丸心未已賊臣惡子休干紀  
魑魅魍魎徒為耳妖腰亂領敢欣喜用之不高亦不庠  
不似長劒須天倚吁嗟光祿英雄弭大食寶刀聊可比  
丹青宛轉麒麟裏光芒六合無泥滓

難綰刀子歌

唐  
盧綸

黃金鞘裏青蘆葉麗若剪成鉤且翬輕冰薄玉狀不分  
一尺寒光堪決雲吹毛可試不可觸似有蟲搜闕裂文

淬之幾墮前池水焉知不是蛟龍子割雞刺虎皆若空  
願應君心逐君指并州難綰竟何人每成此物如有神

日本刀歌

宋  
歐陽脩

昆夷道遠不復通世傳切玉誰能窮寶刀近出日本國  
越賈得之滄海東魚皮裝貼香水鞘黃白間雜鋤與銅  
百金傳入好事手佩服可以禳妖凶傳聞其國居大島  
土壤沃饒風俗好其先徐福詐秦民採藥淹留小童老  
百工五種與之居至今器玩皆精巧前朝貢獻屢往來

士人往往工詞藻徐福行時書未焚逸書百篇今尚存  
令嚴不許傳中國舉世無人識古文先王大典藏蠻貊  
滄波浩蕩無通津令人感激坐流涕鏽澀短刀何足云  
贈戴嗣良歌時罷洪府監兵過廣陵為東坡公  
出所獲西夏刀劒東坡公命作

宋  
晁補之

三郎少日如乳虎代父搏賊驚山東硬弓長箭取官職  
自說九戰皆先鋒將軍拳勇饋不繼痛惜靈武寄謀空



城頭擲掄下俛走壯士志屈羞填胷平生山西踏霜雪  
洪府下濕號兒童聞名未識二十載初見長揖東坡公  
銳頭短後凜八尺氣似飲井垂檐虹只令不語當陣立  
望見已是千夫雄往年身奪五刀劒名玉所擐犀扎同  
晨朝攜來一府看竊指私語驚庭中紅粧擁坐花照酒  
青萍拔鞘堂生風螺旋鉞鏑波起脊白蛟雙挾三蒼龍  
試人一縷立褫魄戲客三招森動容東坡喜為出好礪  
洮鴨綠石如堅銅收藏入匣人意定蛾眉稍進琉璃鍾

太平君子尚小疵戒懼邾小母并蜂舞千兩階庶可覩  
跳空七劍今何庸我為蘇公起揚觶雅歌緩帶聊堪同  
從公請礪歸作硯聞公常諫求邊功

北庭宣元杰西番刀歌

元張憲

金神起持水火齊煅煉陰陽結精銳七月七日授冶師  
手作鉗鋌股為礪一千七百七十鋒脊高體狹刀口洪  
龍飛蛟化歲月久阮師舊物今無蹤呱哇繡鑲柔可曲  
東倭純鋼不受觸賢侯示我西番刀名壓古今刀劍錄

三尖兩刃圭首圓劍脊點點生黑煙朱砂斑痕點人血  
雕青皮軟金鉤聯唐人寶刀誇大食於今利器稱米息  
十年土澗松紋生戎王造時當月蝕平章遺佩固有神  
朱高固始多奇勲三公重器不虛授往繼王祥作輔臣

佩刀行

明  
徐尊生

神人藏舟半天裏絕壑豁豁露舟尾錚然有物墮中宵  
八觚稜增長尺只野僧拾之歸張公化為天矯蒼精龍  
不知何世何年闕奇氣剗犀斷虎一旦生神通魑魅却

走妖邪空張公佩到蓬萊殿天上羣仙驚未見青絲綬  
懸白玉環當畫弧光搖冷電為君淬厲向盤根縱有青  
萍何足羨他年辭榮歸浙山莫行金華赤松間精靈感  
會霹靂吼便恐飛去無時還

楊伯翼贈日本刀歌

明 王穉登

楊郎手持一匣霜贈我拂拭生寒芒鉛刀紛紛空滿目  
君與此鏑皆魚腸南金換却東溟鐵上帶倭兵髑髏血  
血未曾消刃未平皎若蓮花浸秋月燈前細看鷗鵲鋒

入手還疑蛟與龍門外湖深恐飛去朱繩夜縛青芙蓉  
苔花爛斑土花紫白虹沈沈卧寒水歸家不惜十年磨  
他日還能報知己

五言律

刀

唐

李嶠

列辟鳴鸞至惟良佩犢旋帶環疑寫月引鑑似含泉入  
夢華梁上藏鋒彩筆前莫驚開百鍊特擬定三邊

琉球刀

明

徐渭

單刀新試舞雙劍舊能輪雨過腥聞血風旋雪裏身對  
鏤歸思動挂壁崩緇塵醉後時橫看終當贈與人

七言律

詠邵文敬所藏轉刀

明 吳寬

鑠金巧思出工倅獨抱機心展轉危報主久知深自許  
授人難辨倒相持筆端字悟藏鋒妙囊底錐嫌脫穎遲  
詩社埋頭羞銳進吳箋一割尚差差

五言絕句

視刀環歌

唐劉禹錫

常恨言語淺不知人意深今朝兩相視脈脈萬重心

御定佩文齋詠物詩選卷一百四十一